

Պատմական աղբիւրները հաւաստում են, որ Ակնը կառուցուել է 1021 թուականին Սեբաստիայ տեղափոխուած եւ յետագայում այնտեղից տարագրուած Արծրունիների եւ Անիից գաղթած հայերի կողմից: Այս մասին Թ. Ազատեանը իր յիշատակարանում գրում է. «Հին պատմագիրներու համաձայն 1021 թուականին, Սենեքերիմ Արծրունին երբ իր գաւակներով ու հետեւորդներով Սուազ կը գաղթէ Վանէն, իր իշխաններէն ոմանք կը բաժանուին անկէ ու կու գան Եփրատի եզերքը կը շինեն Ակն քաղաքը...»<sup>1</sup>:

Ակնեցիները Վասպուրականի եւ Անիի իշխանական գերդաստանների այն շառաւիղներն են, որոնք պատմաաշխարհագրական նոր միջավայրում եւ կեանքի անսովոր պայմաններում կարողացել են անաղարտ պահել իրենց մեծ նախնիների իշխանական սովորոյթները, տոհմիկ բարքերն ու աւանդոյթները եւ նրանց բնորոշ մենտալ-հոգեբանական առանձնաշատկութիւնները՝ մտքի ճկունութիւնը, հնարամտութիւնը, խոհական դատողութիւնը, ձեռներէցութիւնը, աշխատասիրութիւնը, արժանապատուութիւնը, վայելչասիրութիւնը, նախանձախնդրութիւնը, կամքի ու կորովի կարողութիւնը: Դրանք ուղղակիորէն արտապատկերուած են իրենց կառուցած եկեղեցիների, վանքերի, ապարանքների եւ տների ճարտարապետական հոյակերտ յորինուածքների վրայ: Այս առթիւ հետաքրքիր դիտարկում ունի Ա. Քեչեանը. «Դիտել այդ քաղաքը իր շքեղ ապարանքներով ու թաղերով, եկեղեցիներով ու դպրոցներով, հաւասար է գրքի մը ընթերցման, ուր կը գտնենք

զայն կերտողներու ամբողջական կեանքը...»<sup>2</sup>:

Ակնը տեղակայուած է Արեւմտեան Եփրատի (Կարասու) աջ ափին: Սկզբնաղբիւրներում նրա անունը յիշատակուել է Մայրընդուրիկ<sup>3</sup>, թրքական աղբիւրներում այն կոչուել է Էգին, իսկ աւելի ուշ՝ Քեմալիէ անուններով:

Արեւմտեան Հայաստանի ամենամեծ եւ հայաշատ գիւղաքաղաքներից մէկն է Ակնը, որտեղ 1885 թուականի մարդահամարի տուեալներով բնակուում էր 10 000 մարդ, որից 5442-ը հայ բնակչութիւնն էր: Ակնայ գաւառակը, որն ունէր 100-ից աւելի փոքր ու մեծ հայկական գիւղեր, մինչեւ ցեղասպանութիւնը եղել է Արեւմտեան Հայաստանի Խարբերդի վիճակում, իսկ ներկայումս Թուրքիայի Երզնկայ վիլայէթում: Ակնից յետոյ հայաշատ եւ խոշոր գիւղաքաղաքներ էին Կամարկապը, որն ունէր 1133 հայ բնակչութիւն եւ Ապուչեխը՝ 1066 հայ բնակչութիւն: ԺԹ. դարի 70-80-ական թուականներին Ակնում եւ նրա արուարձաններում հայերի ընդհանուր թիւը հասնում էր 9967-ի, որից, ինչպէս նշեցինք 5442-ը բնակուում էր միայն Ակնում: Յայտնի էին նաեւ Լիճքը, Կարաուշլանը, Նարուերը, Վանքը, Որակը, Շրգուն, Բենկայը, Աշոտկայը, Մուշեղկայը եւ այլ գիւղեր:<sup>4</sup> ԺԶ. դարում Ակնը իր արուարձաններով նոյնպէս նուաճուեց թուրքերի կողմից, որի հետեւանքով հայկական շատ գիւղեր կամաւոր թէ բռնի ձեւով կրօնափոխուեցին եւ տարիների ընթացքում դարձան թրքախօս: Այդ գիւղերի շարքն են դա-

սուել Արգոյը, Ագարակը, Ապրանքը, Սանդուխը եւ այլն (շուրջ 40 գիւղ): Այս մասին Գ. Սրուանձտեանցը ցաւով գրում է «... Այս ո՞րքան թեթեւ է եղած ասոնց հաւատքը, միթէ որոնք որ ցայսօր մնացեր են հայ, պակաս բռնութիւններ կրած են... Ո՛հ, մարդ չկրնար առանց արտասուելու լսել եւ դիտել ասոնք»<sup>5</sup> :

Ակնայ կլիման բարեխառն է, օդը մաքուր եւ առողջարար, ջուրը առատ եւ քաղցրահամ, որի շնորհիւ բուսականութիւնը հարուստ է ու փարթամ: Այստեղ յատկապէս զարգացած էր այգեգործութիւնը, խաղողագործութիւնը, գինեգործութիւնը, շերամապահութիւնը, մեղուաբուծութիւնը եւ այլն: Ակնը առեւտրի ու արհեստների զարգացման կենտրոն էր: Արհեստներից, մասնաւորապէս, զարգացած էր գորգագործութիւնը, կարպետագործութիւնը, մետաքսագործութիւնը, հիւսնութիւնը, կոշկակարութիւնը, ոսկերչութիւնը, արծաթագործութիւնը եւ այլն:

Հայ ժողովրդի համար բոլոր ժամանակներում դպրոցը ազգակերտման եւ ազգապահպան դեր է կատարել՝ դառնալով սերունդների կուտակած պատմամշակութային դարաւոր փորձի ուղղակի հաղորդիչը եւ փոխանցողը յաջորդ սերունդներին: Դպրոցը տուեալ ժողովրդի էթնոպատմամշակութային համակարգի ամենակայուն, ամենակենսունակ եւ ամենակազմակերպուած բնագաւառն է: Հայ ժողովուրդը իր գոյութեան արշալոյսին արդէն իսկ գիտակցել էր դաստիարակութեան քաղաքակրթիչ արժէքը եւ ըստ ամենայնի կարեւորել դպրոցի դերը, բացորոշել նրա հիմնական գործառոյթները: Ինչպէս հայրենիքում, այնպէս էլ հայրենիքից դուրս՝ հայաշատ քաղաքներում եւ գաղութներում, հայերը կառուցել են եկեղեցիներ, հոյաշէն խաչքարերով կերտուած գերեզմանոցներ, հիմնել են

դպրոցներ, բացել են տպարաններ, հրատարակել են պարբերաթերթեր ու հանդէսներ, ստեղծել են հայրենակցական, բարեգործական, մշակութային միութիւններ ու կազմակերպութիւններ:

Թերեւս այս խորհրդածութիւնները չլինէին, եթէ մեր ձեռքի տակ ունենայինք համապատասխան աղբիւրներ, արձանագրութիւններ, վաւերագրութիւններ, յուշարձաններ ու յիշատակարաններ Ակնայ եւ նրա արուարձանների շուրջ վեց դարեայ (1021-1610 թթ.) դպրոցների գոյութեան եւ նրա մշակութային պատմութեան մասին: Անշուշտ եղել են դպրատներ ու կրթարաններ եւ դրանց իսկութիւնը առաջին հերթին երաշխաւորուած է Ակնայ առեղծուածային քաղաքաշինութեամբ, նրա ճարտարապետական ինքնատիպ յորինուածքով, արհեստական բլրաթմբերի վրայ վեր խոյացող եւ ամֆիթատրոն յիշեցնող 3-4 յարկանի քարաշէն տների հոյազեղ շարուածքով, ապշեցուցիչ վարպետութեամբ գծուած ճանապարհ-փողոցների տրամաբանական դասաւորութեամբ, եկեղեցիների, վանքերի եւ մատուռների ճարտարապետական համալիր կառոյցներով (Ս. Աստուածածին, Ս. Գէորգ, Ս. Նշան, Ս. Սարգիս, Ս. Յակոբ, Ս. Յովհաննէս եւ այլն), որոնք կենդանի եւ խօսուն վկաներն են Ակնայ միջնադարեան քաղաքակրթութեան եւ մշակոյթի ծաղկուն շրջանի մասին:

Առաջին սուղ տեղեկութիւնը Ակնայ դպրոցների մասին հաղորդում է Տէր Յովհաննէս քահանայ Դերձակեանի հետեւալ յիշատակութիւնը՝ «Յովհաննէս եպիսկոպոս Ակնեցի պարոնտէր կոչեցեալն, 1610-ին Ս. Փրկչայ վանքին մէջ հաստատած էր ընծայարան մը, ուր աշակերտներ-ընծայացու կ'անուանինք - կ'անուուէին Ակնայ դպրոցներու ընդունակ աշակերտներէն»<sup>6</sup>:

Սոյն յիշատակութիւնից պարզ է դառնում, որ դեռեւս ժէ. դարի սկզբին Ակնում գործել են մէկից անելի դպրոցներ, որոնք ըստ հոլթեան, եղել են բարձրակարգ կրթարաններ, քանի որ, դրանց հիմքի վրայ 1610 թ. Ա. Փրկիչ վանքում բացուել է ընծայարան՝ հոգեւորականներ եւ այլ մասնագէտներ պատրաստելու նպատակով: Մէկ այլ աղբիւրում նոյն քահանան վկայակոչում է վանքի վանահայր ակնեցի Մարտիրոս վարդապետին, որը 1760 թ. Ա. Փրկիչ վանքում նոյնպէս բացել է ընծայարան, որտեղ բարձր կրթութիւն են ստացել թուով 10 «ընդունակ» եւ «երեւելի» աշակերտներ:

Յետագայում ինչպէս Ակնի, այնպէս էլ Արեւմտեան Հայաստանի հնագոյն բնակավայրերի տնտեսութեան եւ մշակոյթի, առանձնապէս դպրոցների մասին, ուշագրաւ տեղեկութիւններ եւ արժէքաւոր փաստագրութիւններ են հաղորդում հայ ազգագրագէտ-բանահաւաք ճանապարհորդների ուղեգրութիւններում<sup>7</sup>: Այս տեսակէտից անգնահատելի է նաեւ Գարեգին Սրուանձտեանցի ներդրումը: Իր Ա եւ Բ հատորներից բաղկացած «Թորոս Աղբար Հայաստանի ճամփորդ» գրքում անուանի Հրապարակախօսը հանգամանալից անդրադարձել է ինչպէս Ակնայ, այնպէս էլ Մարզուանի, Ամասիայի, Թոքադի, Սեբաստիայի, Արաբկիթի, Մալաթիայի եւ այլ գաւառներին եւ հետաքրքիր տեղեկութիւններ արձանագրել այդ բնակավայրերի ժողովրդագրութեան, մշակոյթի եւ դպրոցների մասին՝ մասնաւորապէս նշելով, որ, ժէ. դարի սկզբներին Ակնում եւ նրա արուարձաններում եղել են մէկից անելի դպրատներ, որոնք ժամանակի պահանջներին համապատասխան ունեցել են ուսուցման կազմակերպման ու կառավարման իրենց ինքնուրոյն ձեւերն ու եղա-

նակները՝ մշտապէս կրելով ժամանակի կրթական շարժումների ազդեցութիւնները: Նա ընդգծում է, որ Ազգային սահմանադրութեան հռչակումից յետոյ, ինչպէս Արեւմտեան Հայաստանի, այնպէս էլ Ակնայ եւ նրա արուարձանների դպրոցները սկսել են գործել միասնական, համընդհանուր կրթական ծրագրերով: Այս հարցերին անդրադարձել է նաեւ ակնեցի Սմբատ Դաւթեանը, որը ժ.ժ. դարի վերջերին եւ Ի. դարի սկզբներին Արեւմտեան Հայաստանում նոր դպրոցի եւ նոր մակավարժութեան գաղափարների ջերմեռանդ ջատագովներից է:

Ժ.ժ. դարի 70-80-ական թուականները բեկումնային տարիներ են եղել հայ ազգային կեանքում: Մշակութային զարթոնք էր ապրում նաեւ Ակնը իր արուարձաններով հանդերձ: Այսպէս, կրթութեան ոլորտում կղերապահական ուղղութիւնը հետզհետէ իր տեղը զիջում էր առաջադիմական ուղղութիւններին, ստեղծւում էին կրթալուսաւորական ընկերութիւններ ու միութիւններ, լայն թափ էր առնում թատերական շարժումը, ծաւալւում էին գրական-հրապարակախօսական լուրջ աշխատանքներ, ստեղծւում էին կրթական լսարան-ակումբներ, ուր տարաբնոյթ հարցերի շուրջ կազմակերպւում էին բանախօսութիւններ, բանավէճեր, քննարկում-դիտարկումներ, աստիճանաբար գործողութեան մէջ էին դրւում սահմանադրութեան հռչակած կրթական հիմնադրոյթները, բարձրացւում էին ազգային ինքնագիտակցութեան, ազգային ինքնորոշման եւ ազգի հեռանկարային զարգացման հարցեր: Այս բոլորը, անշուշտ, ազդարարում էին նոր ժամանակների մոտքը, բարձրացնում ազգային գիտակցութեան ոգին, խթանում ազգային գաղափարախօսութեան ձեւաւորման գործընթացը: Նոր ժամանակի ծնունդ

էին նաեւ բարեգործական, հայրենակցական, մշակութային ընկերութիւններն ու միութիւնները, որոնք նպատակ ունէին ժողովրդին կրթել ու լուսաւորել դպրոցաշինութեան, հրապարակախօսութեան, ժողովրդական թանգարանների, կրթական լսարանների, գրադարան-ընթերցարանների հիմնադրման եւ կրթասիրական աւանդոյթների ամրագրման միջոցով:

Առաջին կրթական ընկերութիւնը Ակնում «Ազգասիրական» միութիւնն էր, որի նպատակը դպրոցաշինութիւնն էր: Այսպէս, ընկերութիւնը 1870 թ. հիմնեց Ակնայ միջնակարգ դպրոցը, որտեղ սովորում էին Ակնայ նարեկեան եւ Ներսիսեան նախակրթարաններից ընտրուած լաւագոյն աշակերտները: Իբրեւ վարժարանի տեսուչ եւ ուսուցիչ, լիաթշակ վճարումով, հրաւիրուեց Խոսրով Մուրատեանը, ինտելեկտուալ եւ զարգացած մի անձնաւորութիւն, որը քաջ տիրապետում էր հայերէն, թրքերէն, ֆրանսերէն, անգլերէն լեզուներին: Իբրեւ հայերէնի եւ ֆրանսերէնի այցելու ուսուցիչ հրաւիրուեց նաեւ Ազարիա Դերձակեանը, որը միաժամանակ դարձաւ Ակնայ թատերական շարժման նախաձեռնողը եւ հիմնադիրը՝ 1873 թ. բեմադրելով «Ս. Մեծն Ներսէս» պիեսը<sup>8</sup>: Այս վարժարանի շրջանաւարտներից են եղել Սմբատ Գաբրիէլեանը, Նիկողոս Թոթուայեանը, Վահան Գուլումճեանը, Մարտիրոս Իգնատուսեանը, Սմբատ Դաւթեանը եւ ուրիշներ:

Առաջադէմ երիտասարդների մի խումբ (Ս. Գաբրիէլեան, Հ. Գորեան, Թորոսեան եւ ուրիշներ) հիմնեց «Ուսումնասիրական» ընկերութիւնը, որը Ակնում բացեց լսարան, ժողովրդական թանգարան եւ հրապարակախօսական ակումբ՝ բնակչութեան շրջանում լուսաւորութիւն տարածելու նպատակով: Ընկերութիւնը միաժամանակ հրատարակեց «Ծաղիկ»

շաբաթաթերթը: Ակնում կարճատեւ գործել է նաեւ «Շահաբեր» միութիւնը, որի նպատակը ակնեցիների խնայողութիւնները պահելու համար բանկային համակարգ ստեղծելն էր: Այս միութիւնը, ինչպէս Սրուանձտեանցն է արձանագրում, չի արդարացրել իրեն, քանի որ՝ «Ակնայ յետին հայն անգամ իր ունեցած չունեցածը գօնասօլիտի, բաղդի թղթոյ փոխարինած էր եւ ամենուկն յայտնի է, թէ այս բաղդն ի՞նչ դժբաղդութիւններ բերաւ իրեն յուսացողաց գլխուն. եկեղեցաց եւ վարժարանաց գումարներն ալ միեւնոյն հեղեղը տարած էր»<sup>9</sup>:

Նմանատիպ ընկերութիւններ հիմնուեցին նաեւ Ապուզեխում եւ Կամարկապում: 1880 թ. Հմայեակ Ազատեանի եւ Շաւարշ Հովիւեանի ջանքերով Ապուզեխում հիմնադրուեց «Արշալոյս երիտասարդաց» եւ «Վարագայ Սանուց» միութիւնները: Այստեղ Յարութիւն Պլէխիսան Ապուզեխու խմբագրութեամբ հրատարակուեց նաեւ «Մտրակ» շաբաթաթերթը, որն ունէր ազատական ուղղութեամբ թիւն<sup>10</sup>: Կամարկապում հիմնուեցին «Ազգանագեան», «Դպրոցասիրաց» եւ «Յոյսի պսակ» ընկերութիւնները: Սակայն Ակնայ եւ նրա արուարձանների մշակութային վերելքը երկար կեանք չունեցաւ այն կասեցուեց 1895-1896 թթ. հայկական զանգուածային ջարդերով: 1896 թուականի սեպտեմբերին թուրք ու քուրդ ջարդարները խուժեցին Ակն եւ նրա մերձակայ գիւղերը՝ Լիճք, Բենկայ, Զմարայ, Կասմայ, Ապուզեխ, Կամարկապ եւ այլուր եւ անխնայ կոտորեցին հայերին, կողոպտեցին նրանց գոյքը եւ ունեցուածքը, հրդեհեցին տներն ու եկեղեցիները: Ըստ վիճակագրական տուեալների զոհերի թիւը հասել է 3000-ի<sup>11</sup>:

Սակայն այդ դժնդակ օրերը նոյնպէս անցան եւ ակնեցին նորից ոտքի կանգ-

նեց, վերաշինեց իր տունը, եկեղեցին ու դպրոցը, աշխուժացրեց առեւտուրը եւ մշակութային կեանքը, որն առանձնապէս նոր թափ առաւ 1908 թուականին երիտթուրքերի յեղափոխութեան եւ սահմանադրութեան հռչակման՝ ժամանակագրական առումով, այդ կարճատեւ տարիներին:

1895-1896 թուականներից սկսած արեւմտահայ իրականութեան մէջ նոր թափ առաւ հայաթիւմի մասնաճեղքը, իսկ 1915 թուականի ցեղասպանութեամբ Արեւմտեան Հայաստանում իսպառ մարեց հայկական կեանքը: Ակնեցիների արտագաղթը սկսուել էր դեռեւս ուս-թուրքական պատերազմի (1877-1878 թթ.) տարիներին, իսկ դրանք աւելի յաճախակի եւ հետեւողական բնոյթ կրեցին յատկապէս ժ.թ. դարի վերջին տասնամեակում տեղի ունեցած ողբերգութիւնների հետեւանքով: Այդ մղձաւանջային տարիներին մեծ թուով ակնեցիներ սփռուեցին աշխարհով մէկ, իսկ նրանց զգալի մասը ապաստան գտաւ ԱՄՆ-ում՝ դառնալով այդ երկրի հայկական համայնքի ձեւաւորման առաջին սերնդի ներկայացուցիչները: 1898 թ. Բոստոնում նրանք հիմնեցին «Ակնայ Ուսումնասիրաց ընկերութիւնը», որն ունեցաւ գործունէութեան երեք շրջան՝ 1898-1910 Բոստոնում, 1911-1913՝ Նիւ Եորքում եւ 1919-1926՝ Նիւ Ջերսիում: Ընկերութեան բուն նպատակն էր նիւթական օգնութիւն յատկացնել Ակնայ դպրոցներին, կարիքաւոր ընտանիքներին, իսկ Մեծ եղեռնից յետոյ օգնել եւ օժանդակել աշխարհի տարբեր ծայրերում տարագրուած ակնեցիներին: 1945 թուականին Նիւ Եորքում նրանք հիմնեցին «Ակնայ Հայրենակցական միութիւնը», որի նպատակն էր նիւթապէս օժանդակել տարբեր երկրներում հանգրուանած ակնեցիներին եւ կապ

հաստատել նրանց միջեւ: Միութիւնը իր մասնաճիւղերը ստեղծեց նաեւ Հալէպում, Փարիզում, Ալեքսանդրիայում եւ այլուր:

Ակնը տուել է գիտութեան ու մշակոյթի բազմալատակ մշակներ՝ դրողներ, արուեստագէտներ, ուսուցիչներ, բժիշկներ, իրաւագէտներ, եկեղեցականներ, պետական ու քաղաքական գործիչներ: Ակնից են սերել Գր. Զօհրապը, Ն. Գալանտերեանը, Է. Շահինը, Ռ. Շիշմանեանը, Յ. Նալեանը, Սիամանթոն, Մ. Մեծարենցը, Ա. Արփիարեանը, Ա. Զօպանեանը, Մ. Զերազը եւ այլք: Աւելի քան երկու դար Ակնը ամիրայական նշանաւոր գերդաստաններ է տուել Կոստանդնուպոլսին եւ Զմիւռնիային՝ Տատեաններ, Ճեզայիրլեաններ, Դիւզեաններ, Թերզեաններ, Խորասանճեաններ, Դիւրիններ եւ այլք: Թ. Ազատեանը գրում է՝ «Ակնցի նշանաւոր Ամիրաներ ժ.Ը եւ ժ.Թ դարերուն փայլած են ու իրենց ծառայութիւններով նշանակալից դերեր կատարած են պետական ու հանրային կեանքի մէջ», իսկ պատրիարք Նալեանը իր «Գանձարան Ծանուցմանցում» աւելացնում է՝ «... Ահա այս ազնուականներէն է, որ սերած են համբաւաւոր Ամիրաները, որոնք աւատապետական շրջան մը ապրելէ յետոյ, Օսմանեան տիրապետութենէն վերջ իսթանպուլ եկած եւ իրենց պետական ու հանրային ծառայութիւններով մեծ հռչակ հանած են»<sup>12</sup> :

Ակնը տուել է նաեւ ուսուցիչների փառահեղ սերունդ՝ Սարգիս Գասպեան, Մուրադ վարժապետ, Հայկազուն Պեկեան, Աբրահամ Մուրադեան, Նշան Թորոսեան, Վահրամ Արծրունի, Մաղաքիա Փափազեան, Ազարիա Դերձակեան, Արուս Ազատեան, Արմէնակ Շեփիկեան, Նշան Ճանիկեան եւ շատ ուրիշներ:

Հայ կրթական կեանքում ուշագրաւ երեւոյթներից մէկը թերեւս աղջիկների կրթութեան խնդիրն էր: Օսմանեան

Թուրքիայում, որտեղ թագաւորում էին արեւելեան բարքերն ու սովորոյթները, կինը գրեթէ զրկուած էր մարդկային բոլոր իրաւունքներից եւ դիտոււմ էր իբրեւ վայելքի առարկայ եւ էժան աշխատուծ: Եթէ թուրք կինը տակաւին գտնոււմ էր միջնադարեան եւ արեւելեան գերութեան մէջ՝ կրելով հարեմային կեանքի եւ բազմակնութեան կարգավիճակի նուաստացուցիչ բեռը, ապա նոյն միջավայրում եւ գոյութեան առաւել վատթարագոյն պայմաններում ապրող հայ ժողովուրդը ձեռնամուխ եղաւ աղջիկներին կրթութիւն տալու եւ նրանց համար առանձին վարժարաններ հիմնադրելու արժանայարգ գործին: Դեռեւս ժ.թ. դարի առաջին տասնամեակներին ազգային մեծ բարերար Յարութիւն Պէգճեանը Գում Գաբուլի Մայր վարժարանին կից աղջիկների համար բացեց Արհեստանոց՝ եկեղեցական զգեստներ կարելու նպատակով: Աւելի ուշ Կ. Պոլսում հիմնադրուեց «Լուսաւորչեան աղջկանց» վարժարանը, որտեղ աղջիկները գիտելիքներ ստանալուն զուգահեռ, ձեռք էին բերում նաեւ աշխատանքային հմտութիւններ ու կարողութիւններ: Նմանատիպ վարժարաններ հիմնուեցին նաեւ Կ. Պոլսի միւս թաղամասերում: Գրեթէ նոյն շրջանում Զմիւռնիայում գործեց Հռիփսիմեան վարժարանը, որի ծաղկուն շրջանը Մ. Մամուրեանի տնօրնութեամբ ժ.թ. դարի 80-ական թուականներն էին, երբ վարժարանում սովորում էին 400-ից աւելի աղջիկներ: Ժ.թ. դարի 70-ական թուականներին Գ. Սրուանձտեանցի ջանքերով Վանում բացուեց Սանդիստեան վարժարանը, էրզրումում՝ Թարգմանչաց եւ Հռիփսիմեան, Այնթապում՝ Հայկանուշեան, Կեսարիայում՝ Հայկուհեան իգական վարժարանները: Այդօրինակ վարժարաններ բացուեցին նաեւ Արեւմտեան Հայաստանի միւս գա-

ւառներում եւ Թուրքիայի հայաշատ կենտրոններում: Հարկ է նշել, որ այնտեղ ուր հնարաւոր էր բացել առանձին իգական վարժարաններ, բացում էին երկսեռ վարժարաններ: Այսպէս, օրինակ, Ակնայ գաւառակում գործում էին Ս. Ներսիսեան-Հռիփսիմեան, Արամեան-Սանդիստեան եւ Վարագայ երկսեռ վարժարաններ, որտեղ 1900-1901 դպրոցական շրջանում սովորել են 200-ից աւելի աղջիկներ:

1901-1903 թուականների վիճակագրութեամբ Ակնում, Ապուլեխում, Կամարկապում եւ Բենկայում գործել է չորս դպրոց: Ակնի Ս. Ներսիսեան-Հռիփսիմեան երկսեռ վարժարանը ունեցել է 2 դասարան: Այստեղ 1900-1901 դպրոցական շրջանում սովորել է 450 աշակերտ՝ 320 տղայ, 130 աղջիկ: Ապուլեխում գործել է Վարագայ երկսեռ վարժարանը, այն ունեցել է 6 դասարան, որտեղ նոյն շրջանում սովորել է 115 աշակերտ՝ 73 տղայ, 40 աղջիկ: Կամարկապի Արամեան-Սանդիստեան երկսեռ վարժարանը ունէր 6 դասարան, որտեղ նոյն շրջանում սովորել է 103 աշակերտ՝ 60 տղայ, 43 աղջիկ<sup>13</sup>: Այսպիսով, Ակնայ գաւառակում միայն 1900-1901 դպրոցական շրջանում սովորել է 756 աշակերտ՝ 541 տղայ, 215 աղջիկ:

Ակնայ գաւառակը ունէր 10 եկեղեցի, 5 վանք, որի առաջնորդական տեղապահը այդ շրջանում Տէր Արիստակէս Վարդապետ Խաչատուրեանն էր: Կոստանդնուպոլսի պատրիարքարանի ենթակայութեան ներքոյ Ակնում գործել է նաեւ որբանոց, որտեղ 1900-1901 դպրոցական շրջանում սովորել է 70 երեխայ: Որբանոցը մատակարարուել է արմաւիրցի Թորոսեան եղբայրների կողմից յատկացուած բարեգործական նպաստով: Որբանոցի հոգաբարձութիւնը՝ Տէր Արիստակէս Վարդապետ Խաչատուրեանի նախագա-

հուլիսի 14-ին, որն էլ հետևալ կազմը՝ Տէր Մուշեղ քահանայ Տ. Պողոսեան, Մելքոն էֆէնդի իսակելեան, Առաքել էֆէնդի Սիրունեան, Աստուածատուր էֆէնդի Մարըլեան եւ Մարկոս էֆէնդի Սեմիր-ճեան<sup>14</sup>:

Ակնայ գաւառակի հասարակական-քաղաքական ու մշակութային համայնապատկերը ամբողջական ներկայացնելու նպատակով հարկ է անդրադառնալ նաեւ այդ շրջանում աշխոյժ գործունէութիւն ծաւալած բողոքական եւ միսիոներական կազմակերպութիւններին, որոնք, ունեցել են իրենց կարեւոր դերակատարութիւնը հայ ազգային կեանքում: Նրանց գործունէութեան կենտրոնը, անշուշտ, Կ. Պոլիսն էր, քանի որ այնտեղ էր հաւաքուած հայ մտաւորականութեան ընտրանին: Միսիոնները երկու սեռի հայ երեխաների համար բացել են առանձին բարեկարգ եւ յարմարաւէտ դպրոցներ Վանում, Պարտիզակում, Մարզուանում, Մուշում, Կարինում, Այնթապում, Ակնում եւ այլուր: Յատկապէս աչքի էր ընկնում Այնթապի միսիոներական դպրոցը, որտեղ ուսուցիչների մեծամասնութիւնը հայեր էին, դրանց մէջ իր բեղմնաւոր գործունէութեամբ առանձնանում էր Ալեքսան Պէդ-ճեանը, որը խորագէտ էր բնական գիտութիւնների ասպարէզում եւ բազմաթիւ դասագրքերի եւ ուսումնական ձեռնարկների հեղինակ էր:

Միսիոնները իրենց գործունէութիւնը ծաւալել են նաեւ Ակնում եւ նրա արուարձաններում: Այսպէս, օրինակ, Լ. Չորմիսեանը տեղեկացնում է, որ 1885 թուականին Ակնում գործել են 70 բողոքականներ որոնք հիմնել են նաեւ իրենց դպրոցները: Այստեղ բացուել են նաեւ յարմարաւէտ պայմաններով որբանոցներ, որտեղ այդ շրջանում ընդգրկուել են 100 երեխայ՝ 46 տղայ, 54 աղջիկ<sup>15</sup>:

Միսիոներական դպրոցները առանձնացել են ոչ միայն իրենց շէնքային յարմարաւէտութիւններով ու բարեկարգ կառոյցներով՝ այլեւ առաջնորդուելով ժամանակի լաւագոյն եւ առաջադիմական կրթական ծրագրերով՝ միանգամայն ապահովել եւ երաշխաւորել են կրթութեան բարձր մակարդակ: Այս տեսակէտից միսիոներական դպրոցները դրական դեր են կատարել սովորողների մտաւոր եւ գեղագիտական դաստիարակութեան գործում: Առանձնապէս մեծ է եղել այդ դպրոցների դերը, ինչպէս սովորողների տարակողմանի հետաքրքրութիւնների զարգացման, լեզուների խորիմացութեան (ֆրանսերէն, անգլերէն, գերմաներէն, իտալերէն, թրքերէն), մասնագիտական բարձր պատրաստուածութեան, այնպէս էլ գիտամանկավարժական եւ թարգմանական հարուստ գրականութեան ստեղծման գործում: Հարկ է նշել, որ միսիոներական դպրոցներում փայլուն կրթութիւն եւ մասնագիտութիւն ստացած հայ երիտասարդների զգալի մասը անմնացորդ նուիրումով լրացրել են հայ մտաւորականութեան շարքերը՝ ապահովելով իրենց արժանի տեղը հայ հասարակական, քաղաքական եւ հոգեւոր մշակոյթի պատմութեան հարուստ անդամներում:

ԾԱՆՕԹԱԳՐՈՒԹԻՒՆՆԵՐ

- 1 Թ. Ազատեան, Ակն եւ Ակնցիք, Ազգագրական ու կենսագրական յիշատակարան, Իսթանպուլ, 1943, էջ 20:
- 2 Առաքել Մ. Քեչեան, Ակն եւ Ակնցիք (1020-1915), հտ. Ա, Պոքրեշ, 1942, էջ 58:
- 2 Գ. Սրվանձտեանցի ստուգաբանութեամբ՝ Մայրընդունակ, - Տե՛ս Գ. Սրուանձտեանց, Թորոս Աղբար Հայաստանի ճամփորդ, մաս 1-ին, Կ. Պոլիս, 1879, էջ 250:
- 3 Ակնայ մի շարք գիտերի անուններ ունեն «կայ» վերջածանցը: Գ. Սրուանձտեանցի ստուգաբանութեամբ՝ «կայ» նշանակում է «կայան», «տուն»՝ Մուշեղկայ՝ Մուշեղի տուն, Բեմկայ՝ Բեմիկի տուն եւ այլն ( Տե՛ս Գ. Սրուանձտեանց, նոյն տեղում, էջ 259):

- 4 Նոյն-տեղում, էջ 254:
- 5 Առաքել Մ. Քեչեան, Ակն եւ Ակնցիք, էջ 58:
- 6 Տե՛ս Գ. Նաթանեան, Արտօսը Հայաստանի կամ տեղեկագիր Բալուայ, Բարբերդու, Չարսանճագի, Մապաղչորի եւ Երզնկայա. Կ. Պոլիս, 1878, Ղազար Չարըզ, Յուշամատեան Բարձր Հայքի, Կարինապատում, Բէյրութ, 1957, Լ. Պողոսեան, Հանրի ընդհանուր պատմութիւնը եւ շրջակայ Գուլան-Տաղի հայ գիտերը, Լոս Անջելես, Կալիֆորնիա, 1942, Վահէ Հայկ, Խարբերդ եւ անոր ոսկեղէն դաշտը, յուշամատեան ազգային, պատմական, մշակութային եւ ազգագրական, Նիւու Յորք, 1959, Մ. Միրախրեան, Նկարագրական ուղեւորութիւն ի հայաբնակ գաւառս Արեւելեան Տաճկաստանի, Կ. Պոլիս 1885, Ա.ԴՕ, Վանի, Բիթլիսի եւ Էրզրումի վիլայեթները, Երեւան, 1912, Ա. Գրացեան, Հայաստան, հայեր, պատմութիւն, մշակոյթ, զբաղմունք, կենցաղ, նկարագիր, Շտուտգարդ, 1946 եւ այլն:

- 7 Ազարիա Դերձակեանը սովորել է Կ.Պոլսի ազգային վարժարաններում. իբրեւ ուսուցիչ աշխատել է Պէշիկթաշի ազգային վարժարանում. որտեղ էլ խորէն Գալֆայեանի (Նար-Պեյ) անմիջական ազդեցութեան շնորհիւ ձեռք է բերում թատերական նախասիրութիւններ:
- 8 Գ. Սրուանձտեանց, Թորոս Աղբար, էջ 250:
- 9 Առաքել Մ. Քեչեան, Ակն եւ Ակնցիք, էջ 87:
- 10 Տե՛ս Հայկական Սովետական Հանրագիտարան, հտ.1, Երեւան, 1974, էջ 225:
- 11 Թ. Ազատեան, Ակն եւ Ակնցիք, էջ 11:
- 12 Վիճակացոյց գաւառական ազգային վարժարանաց Թորքիոյ, տետր Ա, Կ.Պոլիս. 1901, էջ 19:
- 13 Տե՛ս Ընդարձակ օրացոյց Ազգային հիւանդանոցի, Կ.Պոլիս, 1900, էջ 351:
- 14 Լեւոն Չորմիսեան, Համապատկեր Արեւմտահայոց մէկ դարու պատմութեան, Ա. հտ., 1850-1878, Բէյրութ, 1972, էջ 499: